

# Muhammad Rasulullah *ṣallā Allāh 'alayhi wa sallam*

## Amal yang Ikhlas kerana Allah

Dari dorongan hati dan sinaran iman, bergeraklah orang yang beriman mengerjakan amal-amal kebajikan sebagaimana yang diperintahkan oleh Allah, semata-mata kerana Allah, bukan kerana riak, atau supaya dipuji orang. Sebab itu amal solehnya memberi manfaat kepada masyarakatnya, dan iapun mendapat pahala yang besar pada sisi Allah *subhānahu wa ta'ālā* – demikian kesimpulan yang diberikan oleh al-Ustādh Muḥammad 'Alī al-Ḥamīdī dalam tulisannya ini. P. Q.

Pada sisi Allah *subhānahu wa ta'ālā* yang sangat diutamakan ialah badan manusia, isi hatinya, atau iman dan kepercayaan yang terkandung di dalamnya. Inilah tempat yang menjadi tinjauan Tuhan, tempat ia membuat perhitungan bagi tiap-tiap manusia.

Tentang ini, Rasulullah *ṣallā Allāh 'alayhi wa ālihi wa sallam* bersabda:

*Inna Allāha lā yanẓuru ilā ajsāmikum wa lā ilā ṣuwarikum wa lakin yanẓuru ilā qulūbikum. (Muslim).*

Ertinya: “Sesungguhnya Allah tidak memperhatikan badan kamu dan rupa kamu, tetapi memerhatikan hati kamu.”

Dari dorongan hati dan sinar iman, bergeraklah si mukmin mengerjakan amal-amal kebajikan sebagaimana diperhatikan oleh Allah, semata-mata kerana Allah, bukan kerana riak, atau supaya dipuji orang. Sebab itu amal solehnya memberi manfaat kepada masyarakatnya, dan iapun

mendapat pahala yang besar pada sisi Allah *subhānahu wa ta'ālā*.

Di dalam *al-Qur'ān al-Karīm*, hal ini diterangkan oleh Allah Ta'ālā:

*Inna al-ladhīna āmanū wa 'amilū al-ṣāliḥāti yahdīhim rabbuhum bi imānihim tajrī min taḥtihilimū al-anhāru fī jannāti al-na'īm. (9, Yūnus).*

Ertinya: “Sesungguhnya orang yang beriman dan mengerjakan amal soleh, mereka akan dipimpin oleh Tuhan mereka ke syurga kerana iman mereka, berhampiran dengan mereka mengalir beberapa sungai di syurga kesenangan.”

Iman dan amal soleh, ialah perkara yang terutama menjadi perhatian Allah *subhānahu wa ta'ālā* terhadap tiap-tiap hambanya. Dari sanalah timbul keikhlasan bekerja, berusaha dan berjuang untuk menegakkan agama Allah dan untuk membela kesuciannya.

Maka dalam gelombang hidup sekarang ini, yang penuh bermacam-macam gangguan dan fitnah, yang mengenai

penghidupan dan kepercayaan, sungguh sangat diperlukan benar adanya keikhlasannya, ketulusan dan kejujuran dari kita kaum muslimin.

Sedikit jumlah kita tetapi tulus ikhlas dalam bekerja dan berjuang, ada lebih berguna daripada jumlah banyak tetapi tidak ada keikhlasannya. Kerana orang yang jiwanya tidak ada keikhlasan, bererti mengandungi penyakit, penyakit yang sangat berbahaya, iaitu penyakit “*nifāq*” (yang menjadikan seseorang itu munafik).

Kalau penyakit *nifāq* sudah memasuki masyarakat kita, maka orang yang dihindgapinya itu, mudah benar menyeberang ke pihak musuh. Kerana ia selalu melihat gambar gembur musuh yang dikiranya kuat, dan melihat pihaknya sendiri diam yang dikiranya lemah dan tidak berdaya demikianlah diterangkan oleh Allah *subhānahu wa ta‘ālā* di dalam *al-Qur‘ān*, firmanNya:

*Fatarā al-ladhīna fī qulūbihim maraḍun yusāri‘ūna fihim yaqūlūna nakshā an tuṣībānā dā‘iratun fa ‘asā Allāhu an ya ‘tiya bi al-faṭḥi aw amrin min ‘indihi fa yuṣbiḥū ‘alā mā asarrū fī anfusihim nādīmīn.* (52, al-Mā‘idah).

Ertinya: “Maka engkau akan melihat orang-orang yang di dalam hatinya ada penyakit *nifāq* (suka bermuka-muka), pergi dengan lekas ke pihak musuh seraya berkata: “Kami takut, bahawa kami akan mendapat kecelakaan”, tetapi mudah-mudahan Allah mendatangkan kemenangan dan pertolongan dari sisinya untuk umat Islam, supaya golongan munafik itu jadi orang-orang yang menyesal atas apa yang mereka telah sembunyikan dalam diri mereka.”

Banyak orang yang mengaku beragama Islam, tetapi tetapi bekerja membantu pihak musuh untuk memadamkan nur Ilahi, agama Allah, janganlah sekali-kali kita berkecil



*Hari Raya Aidil Adha yang berbahagia, disambut oleh umat Islam di seluruh dunia dengan besar dan meriah. Suara takbir bergema di angkasa raya. Masjid-masjid akan melimpah keluar dengan orang-orang Islam yang datang mencurah-curah pada hari yang mulia itu.*

*Masjid yang tersergam dengan indahnya ini ialah sebuah masjid di Timur Tengah, di antara beratus-ratus masjid yang menghiasi bandar Kaherah, ibu negeri Republik Arab Bersatu.*

hati, atau berputus asa. Kerana golongan yang munafik itu ialah ibarat buih yang lenyap dengan sendirinya bila ditiup angin.

Allah *subhānahu wa ta‘ālā* berfirman:

*Fa ammā al-zabādu fa yadhhabu jufā‘an wa ammā mā yanfa‘u al-nāsa fa yamkuthu fī al-ard.* (17, al-Ra‘d).

Ertinya: “Maka ada pun buih, akan hilang dengan sia-sia, dan ada pun apa-apa yang boleh memberi manfaat kepada manusia, maka ia akan tinggal di bumi.”

Seperkara lagi yang seyogianya kita kerjakan, ialah memperbaiki kehidupan orang-orang yang daif dan lemah dalam kalangan kaum muslimin. Mereka ini kerap kali dijadikan umpan oleh pihak musuh untuk menghasut dan mengacau masyarakat Islam.

Di sinilah perlu adanya keikhlasan dari golongan kita yang kuat, yang kaya-kaya dan mampu, untuk membantu dengan bukti yang nyata akan orang-orang yang daif dan lemah itu, supaya tetap imannya dan tidak keluar dari jemaah muslimin. Dan perlu pula diingat, bahawa barangsiapa yang dapat menguasai hati orang-orang yang daif dan lemah itu, maka kemenanganlah berada di tangannya. Nabi Muhammad *ṣallā Allāh ‘alayhi wa ‘ālihi wa sallam* bersabda:

*Hal tunṣarūna illā bi ḍu‘afā’ikum bi da‘watihim wa ikhlāṣihim. (Abu Nu ‘aym).*

Ertinya: “Bukankah kamu diberi kemenangan hanya dengan perantaraan orang yang daif daripada kamu, dengan doa dan keikhlasannya?!”

Mudah-mudahan dengan adanya keikhlasan, Allah berikan kemenangan kepada kita, dan diselamatkannya dari bahaya *nifāq* (dari angkara golongan munafik).

### Asas yang Kuat

Perjuangan manusia dalam menuntut kebahagiaan hidup di dunia ini, adalah ibarat orang mendirikan bangunan. Barangsiapa hendak mendirikan bangunan yang tinggi dan kuat, mestilah ia memperteguh asas atau

sendi bangunan itu, serta yakin akan keteguhannya kerana bangunan yang tinggi itu sangat bergantung kepada asas yang teguh.

Maka perjuangan manusia dan tingkah darjah perjuangannya adalah sebagai bangunan. Dan asasnya atau sendinya perjuangan itu ialah iman atau kepercayaan. Apabila asasnya kuat, dapatlah dia menanggung bangunan itu yang akan berdiri tegak dengan kukuh di atasnya sekiranya bangunan itu rosak masih juga dapat diperbaiki dengan mudah. Tetapi apabila asas sendinya tidak kuat, maka bangunannya pun tidak akan teguh berdiri, dan kalau berdiri tentu tiada tetap, dan apabila rosak sebahagian dari asasnya, nescaya roboh bangunannya.

Orang yang berakal dan bijaksana, akan mengutamakan keteguhan asas sebelum mendirikan bangunan. Tetapi orang yang bebal mendirikan bangunan dengan tidak memperhatikan atau memakai asas dan sendi. Kerana itu bangunannya mudah runtuh dan lekas binasa.

Marilah kita memerhatikan tamsil ibarat tentang asas dan bangunan yang diterangkan oleh Allah *subḥānahu wa ta‘ālā* di dalam *al-Qur ‘ān*. Firman Allah Ta‘ālā:

*Afaman assasa bunyānahu ‘alā taqwā mina Allāhi wa riḍwānin khayrun am man assasa bunyānahū ‘alā shafā jurufin hārin fanhāra bihī fī nāri jahannama wa Allāhu lā yahdī al-qawma al-zālimīn. (109, al-Tawbah)*

Ertinya: “Apakah orang yang mengasaskan bangunannya di atas dasar takwa kepada Allah dan menuntut keredhaannya, lebih baik, atautah orang yang mengasaskan bangunannya di atas tepi jurang yang runtuh lalu runtuhlah ia

bersama bangunannya itu ke dalam neraka *jahannam*. Allah tidak memimpin kaum yang zalim.”

Asas untuk bangunan sesuatu pekerjaan, adalah sebagai kekuatan darah untuk menggerakkan anggota badan manusia. Apabila darah itu kuat, nescaya dapatlah ia menggerakkan anggota badan, dan dapat pula dia menolak bahaya yang datang merosakkannya. Sebaliknya kalau kekuatan darah itu lemah, nescaya lemah pula dia menggerakkan anggota badan, dan mudah pula dihindangi gangguan dari luar.

Tamsil ibarat itu dapatlah kita jadikan sebagai pedoman untuk perjuangan hidup kita di dunia ini.

Kalau perjuangan kita berdasar di atas takwa kepada Allah dan menuntut keredhaan-Nya, nescaya kita berada di atas asas yang teguh dan kuat. Tidak dapat dilemahkan dengan kesenangan, dan tidak dapat dirosakkan

dengan kesusahan. Walau bagaimana juga besarnya ujian dan percubaan datang kepada kita, nescaya pendirian bangunan tadi tetap tegak berdiri, tidak goyang dan tidak runtuh.

Tetapi kalau asas tujuannya hanya semata-mata mencari kesenangan dan kemewahan hidup, maka bangunan yang didirikannya itu tidaklah kuat. Dan kalau ada sedikit sahaja datang ujian dan percubaan, nescaya bangunannya itu rosak dan hancur. Sedang pembangunannya selalu berada dalam syak dan keraguan.

Dasar perjuangan kita ialah Islam, yang bersendikan takwa dan menuntut keredhaan Allah *'azza wa jalla*. Maka di atas dasar itulah kita dengan keyakinan kita akan dapat mencapai apa yang kita tuju dan cita-citakan, dan sanggup menghadapi segala macam ujian kesusahan dan kesenangan.

**Bacalah!**

## **Siri Sejarah Hidup Nabī Muḥammad**

*ṣallā Allāh 'alayhi wa ālihi wa sallam*

Disusun oleh

**Idrūs**

Buku ini disusun dipersesuaikan dengan sukatan pelajaran sejarah Islam untuk pelajaran agama di sekolah kebangsaan di Persekutuan Tanah Melayu. Berpenggal-penggal: 1. Hāshīm ibn 'Abd Manāf 2. 'Abd al-Muṭalib, nenda Nabi, 3. 'Abdullah dan 'Āminah – ayah bonda Nabi, 4. Hari diperanakkan, 5. Ḥalīmat al-Sa'diyyah, 6. Yatim piatu, 7. Berkahwin dengan Siti Khadijah, 8. Menerima wahyu.

Buku ini mengandungi 24 buah. Sambungannya akan segera diterbitkan oleh Qalam Singapura. Harganya 30 sen senaskhah. Belanja mengirim 10 sen.

